

**PRU13 Ketika Musim Haji Nafikan Hak Rakyat Malaysia Mengundi – Hadi Awang**  
**mStar Online**  
**Jun 05, 2012**  
**Oleh NURUL AIN MOHD HUSSAIN**

**PETALING JAYA:** Presiden PAS, Datuk Seri Abdul Hadi Awang mendakwa pilihan raya umum ke-13 (PRU13) akan diadakan pada musim haji tahun ini.

Menurutnya, tindakan mengadakan pilihan raya umum ketika musim haji akan menafikan hak sebahagian besar rakyat untuk mengundi dan memilih kerajaan.

"Tarikh PRU13, masih dalam ramalan pelbagai pihak. Jika musim haji dipilih ia melibatkan jumlah pengundi yang ramai," katanya dalam satu kenyataan pada Selasa.

Beliau berkata demikian sebagai mengulas bila PRU13 akan diadakan.

Mengulas lanjut, Abdul Hadi mendakwa dengan sengaja Umno memisahkan politik daripada agama dan mereka tidak peduli kepada musim haji.

"Ini sekaligus menafikan hak sebahagian besar rakyat.

"Beginilah nasib rakyat Malaysia sejak dahulu sehingga kini. Rakyat diulit dengan berbagai lagu dan irama politik murahan, walaupun merosakkan akhlak dan ditayangkan lagu agama ditempat beragama," katanya.

Beliau yang juga Ahli Parlimen Marang berkata sebagai sebuah negara yang mengamalkan demokrasi kerajaan perlu memilih tarikh pilihan raya yang bersesuaian dan memudahkan rakyat.

"Seluruh dunia yang menghayati sistem demokrasi yang memberi hak kepada rakyat menjadi hakim yang bebas dan adil, hanya badan bebas yang mengendalikan pilihanraya menentukan tarikh pilihanraya.

"Bukan sahaja dipilih tarikh paling selesa kepada rakyat dan semua parti politik yang berhak, bahkan tempoh yang lama telah diketahui umum. Ada kalangan negara telah menetapkan tarikh pilihanraya berikutnya lebih awal, sebaik sahaja pilihanraya umum selesai diadakan. Ada juga menetapkan kemudiannya, tetapi tempoh masa yang lama diketahui umum,"katanya.

Justeru, beliau berharap Malaysia mengamalkan sistem demokrasi berperlembaggan dan tidak melakukan cara yang tidak bertanggungjawab untuk memenangi pilihan raya umu.

"Kita mengharapkan negara Malaysia yang berslogankan sopan santun, naik turun pemimpinnya juga melalui sopan santun, bukannya dengan cara memalukan.

"Mereka akan dikenang sejarah oleh generasi akan datang kerana sejarah tidak mampu ditipu dengan apa cara sekalipun," katanya.

Beliau menyeru masyarakat Islam membetulkan imej Islam dan PAS mampu menggantikan parti pemerintah sedia ada.

"Kita mengajak masyarakat semua kaum amnya bersama Pakatan Rakyat mengganti Barisan Nasional.

"Sekiranya kemenangan berpihak kepada kami, maka segala kerosakan sistem demokrasi yang berlaku wajib diperbetulkan. Walaupun dimasa depan rakyat menolak PAS dan Pakatan Rakyat dengan jalan yang adil disebabkan kesalahan dan kelemahan pemerintahan," katanya.

Hakcipta Terpelihara © 1995-2012 Star Publications (Malaysia) Bhd

Source:

[http://mstar.com.my/berita/cerita.asp?file=/2012/6/5/mstar\\_berita/20120605131611&sec=mstar\\_berita](http://mstar.com.my/berita/cerita.asp?file=/2012/6/5/mstar_berita/20120605131611&sec=mstar_berita)